

IPTA kurang guna bahasa Melayu

KUALA LUMPUR 17 Dis. - Penggunaan bahasa Melayu dalam laporan penyelidikan dan penerbitan di institusi pengajian tinggi awam (IPTA) tempatan didapati pada tahap sangat lemah.

Timbalan Menteri Pendidikan II, P. Kamalanathan berkata, masalah itu dikesan menerusi Audit Pelaksanaan Pelan Tindakan Memartabatkan Bahasa Melayu Sebagai Bahasa Ilmu Di Institusi Pengajian Tinggi (IPT).

Beliau memberitahu, audit yang dijalankan mulai 17 September hingga 2 Oktober lalu itu turut mendapati prestasi penerbitan buku akademik berbahasa Melayu berada pada tahap sederhana.

"Penerbitan berbahasa Melayu juga tidak diambil kira untuk perjawatan dan kenaikan pangkat," katanya ketika menjawab soalan Senator Datin Rahimah Mahamad tentang usaha memartabatkan

bahasa kebangsaan dalam sidang Dewan Negara hari ini.

Audit tersebut dijalankan oleh Dewan Bahasa dan Pustaka (DBP) bersama Bahagian Perancangan, Penyelidikan dan Penyelaras Dasar (Sektor Pengajian Tinggi), Kementerian Pendidikan.

Enam IPTA yang terlibat adalah Universiti Malaya (UM), Universiti Kebangsaan Malaysia (UKM), Universiti Putra Malaysia (UPM), Universiti Utara Malaysia (UUM), Universiti Malaysia Sarawak (Unimas) dan Universiti Malaysia Terengganu (UMT).

Sehubungan itu, Kamalanathan menegaskan, semua IPTA perlu



P. KAMALANATHAN

memberi penekanan terhadap aspek bahasa Melayu dalam aktiviti akademik mulai tahun depan.

"Dasar memartabatkan bahasa Melayu sebagai bahasa ilmu di IPT akan dimasukkan dalam Pelan Pembangunan Pendidikan Tinggi Negara," jelasnya.

Dalam perkembangan berkaitan, beliau berkata, audit bahasa Melayu akan dijalankan ter-

hadap Khazanah Nasional Berhad, Kumpulan Wang Simpanan Pekerja (KWSP), Permodalan Nasional Berhad (PNB), Lembaga Tabung Haji dan Lembaga Tabung Angkatan Tentera (LTAT) pada suku pertama tahun depan.